



Sud Bosne i Hercegovine
Суд Босне и Херцеговине

Broj: S1 3 Iž 043272 22 Iž
Sarajevo, 22.07.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović predsjednika vijeća, Dinke Bešlagić Čovrk i Mirko Božović članova vijeća, odlučujući o žalbi političke stranke BOSS-Bosanska stranka-Mirnes Ajanović- BOSS sa sjedištem u Tuzli, Kojšino br. 7, zastupana po Ajanović Mirnesu, predsjedniku stranke, izjavljenoj protiv odluke Centralne izborne komisije Bosne i Hercegovine broj: 05-01-07-6-1188/21 od 16.06.2022. godine, zbog kršenja Zakona o finansiranju političkih stranaka, u nejavnoj sjednici održanoj dana 22.07.2022. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka BOSS-Bosanska stranka-Mirnes Ajanović odgovorna što u 2019.godini:

- a) finasijska sredstva u iznosu od 23.745,67 KM utrošila je mimo svog utvrđenog Programa utroška sredstava za 2019. godinu, čime je prekršila odredbe člana 4 stav 1 Zakona o finansiranju političkih stranaka

pa joj je na osnovu člana 15 stav 2 i primjenom člana 19 stav 1 tačka a), Zakona o finansiranju političkih strankama izrečena novčana kazna u iznosu od 3.000,00 KM.

Protiv ove odluke politička stranka BOSS-Bosanska stranka-Mirnes Ajanović blagovremeno je uložila žalbu zbog pogrešno utvrđenog činjeničnog stanja i pogrešne primjene materijalnog prava.

U žalbi navodi da je postupajući po zahtjevu Centralne izborne komisije Bosne i Hercegovine dostavio izjašnjenje u kojem se navodi da je dana 08.10.2020. godine dostavio traženu dokumentaciju za 2019. godinu uz koju je dostavljen i rebalans programa utroška sredstava za 2019. godinu. Navodi da je i svih prethodnih godina poslovao na isti način, te da je svoj utrošak korigovao kroz rebalans, obzirom da se u

toku fiskalne godine pojave i dodatni nepredviđeni izdaci. Dana 24.01.2022. godine uz izjašnjenje dostavio je Centralnoj izbornoj komisiji BiH i kopiju rebalansa, te istovremeno i rebalans utroška sredstava za 2020. godinu i 2021. godinu. Zato nema elemenata za povredu odredbe član 4 stav 1 Zakona o finansiranju političkih stranaka.

Stoga predlažu da se žalba uvaži i da se ukine Odluka Centralne izborne komisije BiH .

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilna i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH je razmatrajući Preliminarni izvještaj službe za reviziju o pregledu godišnjeg finasijskog izvještaja za 2019. godinu političke stranke BOSS-Bosanska stranka-Mirnes Ajanović broj 03-07-6-221/20 iz decembra 2020. godine, utvrdila da je politička stranka prekršila odredbe Zakona o finansiranju političkih stranaka. Nakon Preliminarnog izvještaja, Služba za reviziju, sačinila je Konačni izvještaj o pregledu finasijskog izvještaja za 2019. godinu političke stranke BOSS-Bosanska stranka-Mirnes Ajanović.

Navedeno je bilo osnov da Centralna izborna komisija BiH, po službenoj dužnosti, Zaključkom broj 05-1-07-6-1188/21 od 30.12.2021.godine, pokrene postupak utvrđivanja odgovornosti protiv žalitelja, zbog osnovane sumnje da je ova politička stranka u 2019.godini kršila odredbe Zakona o finansiranju političkih stranaka.

U postupku utvrđivanja odgovornosti, Centralna izborna komisija BiH je nakon uvida u Konačni izvještaj utvrdila da je politička stranka BOSS-Bosanska stranka-Mirnes Ajanović finasijska sredstva u iznosu od 23.745,67 KM utrošila mimo svog utvrđenog programa utroška sredstava za 2019. godinu.

Zakon o finansiranju političkih stranaka (Sl. glasnik BiH br. 95/12 sa izmjenama) u članu u članu 4 stav 1 propisuje obavezu političke stranke da finasijska sredstva može koristiti isključivo za ostvarivanje ciljeva utvrđenih programom i statutom.

Iz stanja spisa, prema Konačnom izvještaju politička stranka BOSS-Bosanska stranka-Mirnes Ajanović je prema programu utroška sredstava za 2019. godinu planirala rashode u iznosu od 141.980,00 KM i sredstva za nabavku osnovnih sredstava u iznosu od 5.00,00 KM.

Međutim, uvidom u strukturu ostvarenih troškova utvrđeno je da žalitelj u Programu nije predvidio troškove reklame i propagande, a ostvareni su u iznosu od 11.987,90 KM, zatim iskazala troškove ostalih zakupina u iznosu od 57.224,00 KM što je za 11.224,00 KM više u odnosu na planirana sredstva.

Osim navedenog i troškove zakupa vozila i opravke planirala je 46.000,00 KM. Prekoračila je troškove električne energije za 180,63 KM, tako i ostalog materijala odnosno ostale rashode koji su planirani u iznosu od 2.000,00 KM , a iskazani u iznosu od 2.133,73 KM.

Dakle, prema konačnom izvještaju utvrđeno je da žalitelj sredstva u iznosu od 23.745,67 KM utrošio mimo utvrđenog Programa utroška sredstava za 2019. godinu

Plan utroška sredstava za 2019. godinu politička stranka BOSS-Bosanska stranka-Mirnes Ajanović bila je dužna dostaviti uz godišnji finansijski izvještaj za 2018. godinu najkasnije do 31.03.2019. godine, prema odredbi člana 4 Pravilnika o godišnjim finansijskim izvještajima političkih stranaka, s obzirom da je odredbom člana 4 stav 1 Zakona o finansiranju propisano da finansijska sredstava politička stranka može koristiti isključivo za ostvarivanje ciljeva utvrđenih programom.

Ne mogu se prihvatiti žalbeni navodi kojima se pravda utrošak sredstava prema dostavljenom rebalansu od strane žalitelja, imajući u vidu da je rebalans programa utroška sredstava za 2019. godinu dostavljen izvan zakonom propisanog roka, jer je dostavljen tek u 2022. godini, pa se ne mogu na taj način anulirati propusti žalitelja, jer ni Služba za reviziju finansiranja političkih stranaka isti nije ni mogla razmatrati.

U konkontom slučaju politička stranka BOSS-Bosanska stranka-Mirnes Ajanović počinila je povredu odredbi člana 4 stav 1 Zakona o finansiranju političkih partija (Sl. glasnik 95/12 sa izmjenama). Za navedenu povredu citirani zakon u člana 19 stav 1 tačka a) propisuju novčane kazne u rasponu od 500,00 KM do 10.000,00 KM. Izricanjem novčane kazne od 3.000,00 KM, Centralna izborna komisija BiH je političkoj stranci BOSS-Bosanska stranka-Mirnes Ajanović, izrekla novčanu kaznu u rasponu koji zakon propisuje.

Iz obrazloženja ožalbenog rješenja proizilazi da je prilikom određivanja visine novčane kazne cijenjeno da je u vrijeme donošenja ožalbenog rješenja politička partija bila kažnjena pet puta za kršenje Zakona o finansiranju političkih partija. Nadalje, uzeta je u obzir težina prekršaja za koji je politička partija proglašena odgovornom, kao i finansijsko stanje političke partije prema kome je u godini 2019. ostvarila ukupan prihod od 147.577,79 KM.

Dakle, činjenice na kojima se zasniva utvrđenje odgovornosti proizilaze iz stanja spisa i primjenjivih odredbi Zakona o finansiranju političkih partija. Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
SUDIJA**

Vesna Trifunović